

日本
撰述

本朝高僧傳


四十九
五十

特279

特279-318



18



第四十六百七十號
庫書省訊交

始



本朝高僧傳卷第四十九

濃州盛德沙門 師蠻 撰

感進四之四

播州書寫山圓教寺沙門性空傳

釋性空京兆人太相國諸兄橘公六世之裔大中太
 夫橘善根之子也母源氏延喜十年生及生拳其左
 手父母啓視有針一枚一日乳母睡失空所在周章
 尋求見晏坐庭前花叢中十歲始持法華承平七年
 喪父隨母往日向州心求出家母不敢許天慶八年
 化人來告曰汝子賢人早入佛門母始從志時年三

十六卽登睿山師慈慧僧止剃髮稟戒與慧心檀那等諸師討習教觀辭歸日州結菴霧島數日不食禪坐誦經或從經卷內白粳迸散或於壇上煖餅漏出或當冬夜寒侵弊衣忽自菴上垂綿纏身是以身體肥滑光彩過人住居四載遷筑前背振山晝夜勤修化人來現授成佛記又有羣童兒與空同誦風質清奇音韻和雅康保二年空出筑前巡諸名山求安居地屆播州素盞山見瑞雲變鬣乃登山頂化人又來日山名書寫鷲頭分土嶺號一乘雞足送雲居此者發菩提心得六根淨空卽廬其西洞藉艸爲座綴栴

爲衣山禽野獸無機自馴漸成蘭若號圓教寺空造千手觀音金色藥師不動明王等像十餘軀安置殿堂天人常降作偈讚歎國司藤季厚建立萃堂割莊田一萬町備山衆料空老益精修多得感通永觀二年三月五日夢金剛薩埵授以兩部祕教覺後能記適睿山皇慶將下鎮西入山相看空說夢事慶流淚曰二國傳來金胎印明不違一事奇哉怪哉但有一印與吾所傳少異然所夢當詳恐余軌之誤乎又二神童常侍左右一日乙若一日若丸凡有使令先意能辨四十里程片時往來多武峰增賀上人欲求上

紙空知之使神童贈之賀歎曰空公者夫淨六根人
 與八德山寂心法師菴尉闕金心欲得之空使二童
 持金副書以送山中心拜受驚感一日乙童打斃同
 役空呵驅太童雖悲泣悔訴遂不許空每歲三九月
 修法華會為州民植福偶因有事二年闕典忽有靈
 禽鳴樹上云春秋誅缺二年會讀誦正勤一乘經空
 乃書禽語告眾復其會圓融上皇遣使人山空堅臥
 不起晚紉通害山彌勒寺為終焉所長保四年花山
 上皇登山幸廬仙驛信宿敕延源閣黎圖空肖像並
 記行業膺其下筆山川震動上皇及侍臣皆大驚畏

空曰勿畏圖已亦當震既而果然上皇起禮還都宜
 畫工采女正廣貴再圖之具平親王再製行記參議
 右大辨藤行成清書焉三筆已成遣中使送山寬弘
 四年三月九日告門弟子曰明日當取滅翌日齋時
 結定印向西而逝享年九十有八空從幼至老面有
 微笑口無塵言雖常服弊衣身無蟻虱胸黥彌陀像
 得六根淨能知佗心檀越送食使者僅觸知之不食
 善人來謁預設牀坐不善人至先逃山窟凡所止處
 緇白成市四方聞者莫不作遭佛想藤皇后彰子欲
 登山謁空空謂弟子曰明日八鬼入山汝等遠避問

我只言遊化鎮西屏居寢室既而皇后率侍女八人
士衛數百雜逐入山聞空不在歎曰我特來欲受上
人之教宿緣淺薄不遇而歸時和泉式部爲扈從詠
和歌書柱而出空見之使侍僧呼回皇后后因問曰
女有五障修何免此罪空殷勤說法出法華一部其
篋蓋上書和歌一首併以贈之后大悅謝曰聞微妙
法受大乘經何幸加旃作禮而太慧心院源信僧都
贈偈曰四十年來持一乘衣猶忍辱室慈悲菩提行
願應清淨世世生生爲我師八德山寂心謁見受教
歡喜呈偈曰三千界裏頭陀跡五十年前口誦聲今

日幸容蒙教化西方定識獲相迎具平親王寄排律
長篇曰寂寥山上坐禪師一乘蓮華能憶持掌底鐵
針出胎日經中白梗絕糧時妙文暗記眠猶誦法力
冥薰貌未衰武公都應身淨潔禽馴只爲意慈悲雖
歡同代聞來久更恨終年面禮遲假使眼前無見我
猶勝耳外不知誰豈唯今世述君美便是當來讚佛
詞再拜西南遙寄語慧光早照我愚癡其爲高僧貴
官所稱如斯其餘異蹟不遑備載焉
贊曰得六根淨者應真已上之事非庸人之所及焉
此方先達感進者多至淨六根者空公之外世以稀

也感得金剛薩埵之真授不登層樓而坐目千里此其事也只是以自性空人我應用無礙也想其誕彌時拳中有針是卽宿因所徵乎余拜瞻其真照顏範清癯恰似天台山上羅漢之相矣又讀其平親王之排律分明模寫真個空上人故載本傳以清後學之目焉

江州園城寺沙門勸修傳

釋勸修姓紀氏京兆人其母求嗣禱佛夢星光入懷因而有孕迨生有比丘性淡嫌葷膾家人戲以海月入其口卽病而生瘡形如海月父母驚恐誓曰此瘡

苟除必捨兒奉_二靈言訖立痊十一從睿山靜祐法師爲驅烏先_一日祐夢數僧荷觀音像來天明修至祐大悅爲吉徵具戒以後學業早成就餘慶僧正承灌頂法謁勢祐僧都益質所業才名四聞長德三年宋國送台書五部此方學者疑評過半因茲朝廷命慈覺智證兩徒加毀破法華示珠指上卷實因破之下卷修預初永延元年羽林中郎將藤道長陰語修曰我不得法驗難受大拜願師加意修諾而持念翌年藤公遷黃門侍郎相尋至右僕射左僕射未及十年轉大丞相實修之力也一日術者告藤府曰某日

家內有怪可深慎焉至期相國閉門謝客晡時自和
州籠牯瓜來開門納之豈修在座太史安倍晴明太
醫重雅陪侍相國乃薦之諸彥謂安氏我亦可嘗否
安氏曰此瓜中有毒不可輒啖也相國謂修曰幾許
願瓜孰爲有毒邪修乃誦呪加持俄一瓜騰躍宛轉
一座驚怪重雅懷中出針劄之騰躍便止華而視之
中有毒蛇針貫其眼都下歎三子之術矣實因法師
乞法性寺座主位一條帝親其器而不在因含怒而
死其靈惱帝詔修加持乃託曰我是實因也雖深望
帝爲明王所縛我今太矣修曰公已台宗學匠也平

生所蘊今尚記憶乎因曰名字觀行隔生卽忘況理
卽之身乎君臣聞之歎敬東宮亮業遠遭病暴死相
國聞曰想夫有遺言之事哀哉不言邪殷勤屈修修
住宅加持須臾業遠忽蘇合掌拜修審言後事遂長
往矣藤公憑修之法驗凡十餘回不違其記仍建淨
妙寺延修爲開山祖永屬乎門葉矣長德三年補園
城寺長吏長保三年任大僧正寬弘五年七月八日
向西合爪辭衆而寂春秋六十四修居千光院世稱
長谷大僧正後一條帝追崇其德寬仁三年季冬益
號智靜焉

贊曰山門三井之學人或精於顯而麤於密焉或精於密而麤於顯焉唯修公兩輪並馳如載本傳也若夫詰實因之靈以今尚記乎者彼若答記之即欲以止觀所謂觀法雖正著心同邪之祖語俾恥之也因靈早察其機乃舉六即之凡位謙詞而退然則修公之問不虛設也讀者其致心焉

京兆修學院沙門勝算傳 穆算

釋勝算姓滋野氏京城人十四出家學止觀於運昭稟灌頂於餘慶嘗於禁殿與橫川源信對論算屢滯澀因捨顯專歸密修練精勤早得靈應聲名籍甚一

條帝弗豫久歷年月膳職已廢思食生梅時當窮冬無由尋索算一夜向庭梅持念翼朝謂侍僧曰汝下庭看梅定可有子矣侍僧到樹邊適大雪覆埋枝條不分掃雪見之梅子纍纍宛如初夏算乃枝折獻宮君臣奇歎帝嘗一兩顆久病立痊藤皇后彰子俄在疾名算加持有神人縛靈於梁間靈負痛叫喚聲響宮中后疾即愈公主娟子後朱雀帝女下嫁源僕射俊房俄有狂病僕射徵服詣院乞算法祈公主中夜呼曰救我救我有龍加劍我頭童子又以繩縛我侍女持燭驚見更無佗物翌晨狂息藤相國長子賴通

病狂風命駕往修學院求算法救中途氣絕相國尋
來哀懇甚切算枕膝持誦少選即蘇相國大悅起禮
三拜源信僧都之妹安養尼在病頓殂信公昇屍謂
算曰人生有外何可強惜只得暫時蘇勸之念佛爲
樂國資糧願惠法驗算乃誦火界咒信公亦唱地藏
密號未及十遍尼俄蘇曰我居閻王宮不動明王火
燄熾然遮路而立地藏薩埵引我而歸信公悲喜交
感以乃祖傳來麻布三衣與算三度禮拜算笑曰管
年宮論之滯今已解矣乃脫所披之袈裟奉信公遠
近聞傳隨喜讚歎尼後經六年而死播州刺史佐公

行初微時從算遊一日語曰我得救于小州而爲政
則足矣恐不遂志與算曰姬魚達子之需不晚耳不
幾得播絲是佐氏建洛北修學院以酬德惠一條帝
上爲官寺算嘗夢拜不動明王於是自刻等身尊像
而安置殿上算一時向朝且立劔持念赤龍俄降纏
著于劔本朝工治雕龍形於劔中蓋自此始也正曆
二年補園城寺長吏長保四年任權僧正寬弘八年
八月二十二日或曰十月二十九日使門人唱彌陀密號自誦
彌陀大咒禮拜尊像向西而滅滿齡七十有三歷臘
六十有一病中賜智觀號旌其德矣又同門有穆算

博顯精密智行蓋代矣

系曰夫梅者季春開花中夏結果今嚴冬成子寧不
涉怪乎通曰學世教者執此局見而不知佛法有靈
驗世之得仙術者尚有隨與不特而率況法身不思
議之祕咒豈無感徵邪不入其門者疑以為怪能達
此法者信而為常此事我先已辯焉

江州延曆寺沙門慶圓傳

釋慶圓播州刺史藤尹文之子蚤登睿山從三昧院
喜慶別深受戒學台密法薰練既成一時修北斗法
至召請印明七星俄降團圍著供物而今作圓壇始

於圓也寬弘八年一條帝不豫召院源及圓待于禁
闈既而帝崩圓語院源曰天王病閒謂圓曰若至大
漸必勸念佛今事已違悲哉然吾儕可憑佛陀之冥
助方在此秋也公其勳力源因搥磬啓白圓誦火界
咒至精加持未及百遍天王俄蘇左右侍臣靡不感
悅藤相國來於直廬悲泣替頌歎未曾有圓乃近於
御帳勸唱念佛天王合掌稱號百餘友遂長登遐焉
此歲任權僧正萬壽二年後一條帝病惱召圓加持
其病即瘳賜封七十戶藤相國病屈圓修法圓曰先
是令子顯信遁睿山時相國率諸門族乘馬入山山

衆投飛礮以遮馬騎是卽山王明神之所祟也今其
奈何神慮相國起於病竇謂圓曰罷子出家老父往
瞰天倫之情神其舍諸況亦名師之誠祈乎圓曰富
哉言也乃依法加持病痛瘳長和三年春敕任僧正
是歲冬轉大僧正翌歲補延曆寺座主山中大和寬
仁三年七月二十一日無疾而寂壽七十又一

京兆仁和寺沙門濟信傳

釋濟信左僕射源雅信之子生器不凡初入勸修寺
雅慶僧正室學諸密教兼習法相後稟灌頂大法於
遍照寺寬朝至密水源委揚厲無剩住仁和之喜多

院公卿士庶仰其法德長德四年敕爲東寺長者從
此頻進任權少僧都長保三年春三月奉敕於真言
院修攘疫法而得効驗賞兼法務明年七月轉權大
僧都寬弘二年冬補東大寺主三年四月辭大僧都
讓園城寺永圓阿闍梨圓者信之甥也讓僧官於佗
門可爲初例也寬仁三年冬十月詔爲大僧正明年
春聽乘車出入禁門僧家蒙此宣以信爲始治安三
年中冬辭僧職閑居舊院長元二年十二月晦日帝
給封七十戶二年六月十一日化壽七十有七葬於
觀音院灌頂堂後信有傳法灌頂弟子五人仁和寺

性信華藏院延尋山階寺賢尋大僧都念緣律師永
昭皆有英名也

江州延曆寺沙門慶命傳

釋慶命太宰府少貳藤敷友之子平安城人隨靜慮
院遍救稟戒習學華質有倫根文無懈追琢法華尤
善觀心住無動守敷覺運義懿德言行神人以感一
時山王祭禮神輿不動及日已昏巫懼以告命對神
興誦十如實相文精心持念輿輕如故羣聚道俗極
口唵嘆又某年六月夜山王神殿衝暑禪坐俄大雪
降積殿傍石盈一尺餘時人名其石曰白石又與大

官神屢對論止觀深理云萬壽五年補延曆寺座主
長元三年秋藤太皇后彰子建東北院請命爲落慶
供養導師賜封七十戶長曆二年九月七日委順壽
七十四命博覽台敷著拈拾鈔便于學侶有弟子隆
範澄豪共名達也

京兆禪林寺沙門深覺傳

釋深覺右僕射藤師輔之子尋禪之胞弟也師寬朝
僧正受祕密灌頂又就寬忠僧正益研家學住洛東
禪林寺張皇密綱當時併勸修勝算稱瑜伽之三傑
正曆長德間補東大寺務者三回長保五年爲東寺

長者任權少僧都長和元年轉權僧正無何解諸職
寬仁元年重爲長者治安三年昇太僧正初長保元
年僕射寢病藥針無効丹波刺史經國承命召覺諸
山名德列於府亭覺曰聞久絕飲食先可薦之三井
勸修謂覺曰當以如意輪咒被加持覺諾持念須臾
僕射嗽粥尋痊長和五年夏天下大旱覺爲國家修
請雨經法於神泉苑大相國藤公頻諫曰曼之無驗
有緇素之誦覺曰我不業田畝非可憂炎旱只爲萬
民欲禱法雨幸當我任矣若夫感應任數之存何顧
世人之誦乎自曉至午誠心誦孔雀經時雲雷鳴覆

暴雨如沃華夷受賜朝野抃躍相國悔其始諫極口
稱冀萬壽二年夏後一條帝不豫召覺入宮念如意
輪咒玉體平愈賜牛車宣四年春東宮患瘡人疑華
舍念不動咒瘡瘡忽除心神如常號賜御衣綾服沈
香念珠入銀篋逮其出內東宮起送藤關白腹疾請
覺法救覺到勸圍碁近臣嘲之覺強不已司畢疾止
長元二年賜封七十五戶四年辭諸職六年癸酉又
爲東寺長者長久四年九月十四日泊然而化保齡
八十有九靈感多難具記焉
贊曰正曆寬弘之間顯密諸師得神驗者如稻麻竹

日本書紀卷之四十九
本朝高僧傳卷之四十九
葦就中覺公選於三傑之數則其德可見焉今觀其
行狀實靈感無方也邪

城州醍醐寺沙門仁海傳

釋仁海或曰泉州宮道氏之子也七歲登高野山事
雅真法師真嘗焚書大佛頂咒海在碗見之退以火
箸書於灰上不幾一點髮髯有梵象真見爲奇後隨
石山元果大僧都受傳法灌頂遊學密場博挹衆流
醍醐小野縣開曼荼羅寺熾唱密乘四來受業者幾
有千人時廣澤有寬朝與海齊名世謂之小野廣澤
兩派海性篤精感通有効寬仁二年六月畿甸炎旱

詔於神泉苑修請雨經法登日晡時甘雨大降萬壽
長元間奉敷祈雨心慮九度皆立奏應其修法際或
紫雲池中出或赤蛇壇下蟠僧俗咸見之治安三年
冬任權少僧都加東寺二年長者長元二年補東大寺
務長曆二年救轉僧位時俗呼雨僧正長久六年聽
輦車賜封七十戶皆法雨之賞也賀詔書者官僚盈
門藤原相賀詩有投花請雨龍蛇見結水分霑井邑
平之句初藤原相國道長招小野宮右府於家亭海亦
會之庭下樹陰俄有雄童射藤原相國海起遮之其箭
中股藤原周有恨道長使檢伽者修大元帥法詛於

藤公今流鏑者甚多詛之所致也海以永承元年五月十六日化於住房春秋九十二或九十四密耀傳法弟子若成尊成典性信等二十三人共傑出化一方矣贊曰物之分者理之常也然本不大者其末無分矣禹貢四瀆九江其有支流也可知焉海公者弘法大師之八傳而枝葉相分敷衍倍徒猶如八卦之多錯綜爲六十四也擴而充之則至於無彊是所以其本之大也

京兆仁和寺沙門成典傳

釋成典不詳姓譜小野仁海僧正之弟子也得灌頂

後居仁和之圓堂院法驗之譽當時無曠一時魔魅來窺典誦理趣經一切諸魔不能壞之文魔魅斃於階下又賀武社誦孔雀經至乎牛頭天主之句俄殿後山有牛鳴之聲典又一日修聖天法至結祕印備供物天像彈舌其像勸修寺門流至今傳序朝廷崇其德賜封尸七十五治安三年爲東寺長者萬壽四年春任權少僧都長元四年轉大長曆二年六月十八日與仁海共轉權僧正師弟同日進僧綱者古來以稀也仁海嘗禱弘法大師像曰大師雖入那伽定必有分身導物願爲指示令我歸仰一夜夢大師告

曰汝徒成典是其一也海曰以何爲驗曰左足掌有黑子海凌晨往仁和寺驗之果然因拜於地典大驚問之海告其由典曰嘗聞性信僧正出利利種智行兼備此大師之後身也我豈敢當之乎起而拜謝長元八年皇后禎子陽明門院懷妊請典修不空絹索法不幾皇子誕彌後三條院是也帝有睿感革典住房賜額圓教寺置阿闍黎四人平生之法驗大率此類也寬德元年十月二十四日遷化保壽八十有七矣贊曰爲弘法大師之後身者教有性信典公等禪有滅宗寂室等蓋大師已躋第三地故其一生之妙用

可勝稱焉推其利生無邊之願則豈有定前定後之隔乎契經曰菩薩住此地示現百千身一一身百千菩薩以爲眷屬依此觀之典公爲薩埵之眷屬也著矣而今談世間法者聞後身之說則疑以爲怪依其撥無因果而不知本命元辰也

和州忍辱山沙門命禪傳

釋命禪姓小野氏春時之胤裔也妙年祝髮投和州大安寺學法相宗後從寬空僧正受瑜伽祕法兼涉台教梵行潔白人皆稱焉住三輪五大輪寺平日歸觀音大士崇信孔勤萬壽三年遊履諸刹拜瞻聖像

齊忍辱山覽林巒幽翠如千葉芙蓉自謂是沙門之所可憩也輒紉精藍而安十一面大悲像春日神不所作也不幾鄰近懷德遂化窳坊號圓成寺從此大悲靈感日新四旁僧俗瞻禮發信長久元年罹疫恙披僧伽熱觀音像前燒香跏坐結定印而化世齡七十八法臘若干歲

尾州賢林寺沙門戒深傳

釋戒深尾州賢林寺住僧也五十餘歲不出寺門日夜課法華一日有物墮於庭上其聲如雷深起而見之有舍利其色純白置諸砧上試以鐵錘砧錘陷而

舍利不瑕又投水不沈深乃刻佛像以藏其中畢世供養臨終對像端坐結印而化經數日身不壞州人欽其德樹塔以祀之夫疑舍利之真偽而或試於砧錘或投諸水火者支那僧傳亦有之深公已得降感則何疑之再三試之信心不足乎

江州園城寺沙門心譽傳

釋心譽京兆人金吾衛將軍藤重輔之子從園城寺勸修穆算二師受顯密教法臘已高驗應如響黃門侍郎隆家其室患疱百醫束手侍郎乞法救譽持念加持其疱忽拔躍衝藻井瘡痕自愈侍郎大喜有兒

七歲捨備給侍長名隆明長和四年夏帝患兩眼吏部尚書元方賀靜法師之靈爲之祟也名譽加持二靈降伏御眼卽明萬壽三年夏後一條帝違和召山門三井名德修五壇法譽修中央過二七日皆破壇太譽獨留持念聖躬卽登相國賴通藤公朝退俄病請譽相府告少女託曰非有佗事惡氣逼惱先于和尚護神禳之瀉氣卽除譽嘗曰我欲降靈氣閉目觀心其靈忽退必不依祀或曰有據否譽曰止觀明文古德謨訓也大相國道長藤公登高野山於弘法大師之廟請滿山衆僧供養法華經延譽爲導師蓋智

證者弘法之族姪以異於佗門也長元元年任權僧正是歲秋司園城寺長吏初寬仁元年冬譽與衆相謀欲始碩學立義於園城寺三年十一月上表奏朝制曰可因山中唐院置阿闍梨五人治安二年相國道長藤公延譽主法成寺從此智證門徒永掌寺務譽常修彌陀法爲往生之因每至晡時向西合掌誦但聞佛名一菩薩名除無量生死之罪文悲淚禮拜臨臥不違日課正心而寂保壽八十有九寬德二年八月十一日也

江州三井沙門行圓傳

釋行圓通議大夫源國舉之子俗名國輔仕爲進士
隨父行州龍安天久屍已脹爛及圓歸家不敢正視
卽發成髮園城遊勸修心譽之門矢志修學善
綜顯密灌頂已降常行彌陀法一日修如意輪供感
大士放光現容壇上山王明神語圓曰我名山王公
知之乎表三諦卽一也山字豎二畫空假中世橫一
畫卽一也王字三畫二諦也豎一畫一也一字三畫
而有一貫之象故我立以爲號卽是一心三觀一念
三千也故我護持台教鎮護國家我身外無名名外
無身卽身而名卽名而身名外無法法外無名卽身

而法卽法而名身與名法無二無二是名一乘是我
名義也圓感神達于妙義嘗與小野仁海僧正奉詔
祈雨海公修請雨經法圓修水天供至第二日甘雨
大澍人賀海所海曰非我法驗是圓公法供之雨也
後膺雷鳴且是我龍神供之時也至第七日果如海
言圓承承二年正月八日頭北面西如眠而寂月輪
現室香氣薰庭一七日後門人見墳蓮華數莖生於
墳土異日見之一莖亦無
贊曰觀神之所談皆台教圓融之極致也甚可爲奇
妙矣又察其人而語之則圓公之所蘊可亦知焉

京兆東寺沙門深觀傳

釋深觀華山上皇子爲兒落餅乃就上皇稟密灌後從深覺大僧止承傳法灌頂天機秀發密學歷時長元四年敕任權少僧都長曆元年領東大寺居十四年薨山欽仰長久四年冬爲東寺長者尋轉大僧都永承初補寺務二年七月旱有旨於東寺修孔雀經法約以七日當期命弟子光禪持神供屆神泉苑膺踰小池禪閣梨蹶倒水中寺僧僉曰是吉徵也先例儘多是夕大雨普及郊垌四年兼領法務明年六月十五日寂壽算五十

江州睿山沙門皇慶傳

釋皇慶世姓橘氏黃門侍郎廣相之曾孫書寫性空法師之姪也其母懷胎誓絕葷羶及生奇異甫七歲登睿山下有柿樹素不結子俗名其地曰不實柿慶問人此地何名人以其名答之昔餘樹皆有實慶曰旣名不實因甚有果前至翠微有一館亭置湯藥以給遊人俗呼爲水飲慶曰旣稱水飲奈何飲湯乎及上山頂小竹叢生慶復問答曰大嶽也慶曰旣號大嶽何有小竹邪隨東塔院靜真僧都學瑜伽法至於護摩灌頂梵字悉曇莫不研徹答慈覺大師以祕密

日本書紀 卷之四十九
宗授長意授玄昭昭授智淵淵授明靜靜授靜真
世以慶爲慈覺七世之孫慶好歷法嘗遊鎮西邂逅
景雲阿闍梨東寺密傳之魁也慶就請益雲爲偉器
悉付祕奧授弘法大師寶峴以爲傳契之信也慶欲
入宋國共寂照上船時鳩數千羽集于檣逐之不起
舟師曰恐異人在船乃下衆鳩尚不散逮于慶下鳩
皆飛散人多曰八幡大神捉留焉夏於背振山有延
殷者顯密之英也相共修法慶誦驚發地神偈以印
手按地地大震願誠殷曰至于成佛慎勿語人長德
年中居于豫州國守知章聽慶法驗修普賢延命法

國守夢普賢菩薩乘六牙白象來入道場慶病大聖
歡喜天現形手捧盃曰我爲護神須臾不離帝釋命
曰師疾至篤每朝用桑露一盞不可拘禁也其器大
容半升許慶如放其病瘳萬壽年中丹波池上結菴
閑居刺史章任祝朝令修十臂毘沙門法天子感靈
夢賜僧官爲法興院十禪師有同業覺運長慶數十
歲靜真病時啓曰師若不起令我依誰真曰池上皇
慶乃汝之師也運躡其言就稟密教極致敬禮一朝
禮舍利舍利放光盈室慶詣四天王寺瞻禮舍利本
是三粒分爲八粒一日薄暮童子來乞侍巾鉢身體

偉壯慶問從何許來童曰多年侍書寫性空上人會
一蒼頭偷上人齋食我不耐忿以拳加頭其者即死
上人愍厲乃驅我大慶與飲食童懃回願加印咒我
易受耳使童數百里外不半時復命或令滌衣服憑
虛坐之不須桁竿靈異甚多一時諸役列坐戲謔以
拳打輔車相巡至童童辭曰恐至大故諸役強之童
緣加拳吐血殆殂慶聞擯太童泣曰背振山地動者
堅牢善女天出現之時也我親見之故感德來也今
遭厄片悲哉長曆年中有慈覺智證兩門之爭朝以
慶之德望共血下山歸譴於慶慶曰官事若急可容乙

童朝議思慶之護持神不敢加罪慶在丹丘時夢山
王神日子益歸本山便割其背出血三所因茲歸睿
山以永承四年七月二十六日寂于東塔院享齡七
十三其二血者表三派密傳也果有門弟長宴院尊
安慶三傑各旌門幟支派連綿云
贊曰慶公者慈覺之法孫性空之族姪精于密乘靈
於加持也有由來矣意者匪帝密乘顯教亦復如是
人只依其所長而言之爾

京兆真如堂沙門戒算傳

釋戒算不知何許人久留睿山學台教通觀理後專

修西方教永觀二年春常行堂本尊彌陀夢告算日
 吾將思出聚洛濟度一切衆生汝其謀之算乃告衆
 相攸於東山神樂岡止曆二年承宣旨建構成號鈴
 聲山真如堂五年八月十一日請山門碩德遷佛供
 養長保元年春算造刻丈六涅槃佛安後門階殿自
 二月中旬至四月初營涅槃會修不斷念佛每日午
 時算講淨經都人士女羣來填門天喜元年正月二
 十七日至老疾逼正念而化保齡九十一矣中古移
 寺洛中屢逢飛馬災元祿年中復歸舊址焉
 本朝高僧傳卷第四十九

音訓

拳 達員切 迸 比孟切 虱 色櫛切 冷 千山切 遷 達合切
 賴 再沼切 關 盧官切 簣 側格切 按 於幹切 斥 昌石切

江府住玉泉軒成九居士信施淨財鑿
 本朝高僧傳卷四十九 茲冀
 上報四恩下資三有宗道繁興種智圓明
 寶永丁亥佛成道之日
 濃州路加納盛德禪寺 知藏比丘 識

本朝高僧傳卷第五十

濃州盛德沙門 師蠻 撰

感進四之五

江州延曆寺沙門源心傳

釋源心，輿州太守平基衡子，少登睿山，隨西方院院源，剃戒就寶幢院，覺慶承顯密法，行業純精，善誦法華，聽者忘倦，書寫山性空裝法華一部，日須待靈山同門衆來慶讚此經，一日謂徒曰：今日慶讚人來矣，其日心謁請為導師，心年尚少，不辭陞座，演讚流暢，空觀菩提子念珠，其數有九十八顆，相國道長藤公

聞而乞之。某年五月梅雨始晴，有蒙衣女黃昏于謁。日妾在東山祇園，其所頃者得佛像，請師慶讚。明日午時必仰光，貴心許諾。女合掌而忖心，赴請期。女出迎，肅文席雙敷，畫屏四施，小堂安佛，莊嚴端麗。既齋時至，備六高几，著赤袴，女三四人出，成饌交薦，其味甘美，殆非人間齋畢說法。女人數十圍繞而聽。女門送，曰：以無僕從，不獻。嗟，願為凌晨人，齋請三十四，辭曰：昨日之法施也，使相其攸人境失矣。心曰：羅刹國人化作佛堂，試我道法也。而其絹用之不盡云。又心一日衝雨入城，一女趨就而泣，曰：我羅刹女也。鬼帥

遣我捕人，倘不得則噉我身。願師法力，救出我苦心。歸講法華者一座，其夜夢謝曰：依師講經，脫鬼趣，升天界矣。永承二年補延曆寺座主，五年冬任大僧都。天喜元年十月十日無病而化，壽八十三矣。

城州勝林院沙門寂源傳

釋寂源，左大臣雅信源公之子也。俗名時信，早繼門業，聲於羽林。俄厭世相，從池上皇慶落髮出家。學顯密法，能挹器水。長和二年入大原山，創勝林院。六時行道，感毘沙門天執蓋，隨後臨終之時，有紫雲覆牀之瑞云。

江州延曆寺沙門源泉傳

釋源泉，播州人。上園城寺久隨，餘慶精禪。與贖住三井法輪院，布顯密教。長久四年，清涼殿最勝會，詔爲講師。詞辯傾座，至四天王品，廣目多聞。四主現於殿上，帝起禮拜。餘者不見，救敘法眼。爾來最勝道場，救設四天王座，爲寬德年中任。權僧正天喜元年春二月，丞相賴通藤公宇治平等院建阿彌陀堂，膺落慶。且招講三井山門，碩德營供養法泉，爲導師。秋七月，爲平等院阿闍梨，尋領寺務。是歲十月二十六日奉敕，爲延曆寺座主。衆議鼎沸三日，退還。三年二月某

日化，歲七十九。

江州睿山沙門桓舜傳

釋桓舜，號月藏。備後刺史源致遠子，入延曆寺。從座主慶圓，肄台教。譽于山中，貞圓日助遍救。時有太名合舜，爲四傑矣。遊化豆州，詣溫泉神祇。七日說法，夢神告曰：師早歸山，必昇顯位。後當生西方淨刹。未幾，有詔宣爲最勝會講師。至太僧都任法性寺座主，領天王寺。天喜五年九月十日，年滿八十，安庠而化。舜諱山王明神，祈福經年無應。祈看何神，第七夜夢神女出殿，持片紙貼舜胸上，有千石二字。舜大悅，俄山

王明神備儀衛來神女出迂日何故動尊儀耶神曰沙門桓舜求福於我尤為懇到我所不應者以此人畢一生當生淨刹若受富樂吝者穢土難得出離故為彼來也神女驚曰妾不辨事漫酬精祈乃收其紙而太舜夢寤拜山王云

贊曰吾佛之制壞亦瓦鉢而已求福者非志也矧癡福者三世之冤乎山王之不與亦守佛意矣舜公以非禮之需而得來果之徵者以其直性乎

江州三井沙門覺助傳

釋覺助平安城人金紫光祿大夫藤道雅子少入園

城從行圓心譽二師受祕密教早得法驗天喜三年冬藤亞相經長妻有病延諸名德修五壇法助預焉中夜妻歿諸師破壇助獨不忒持念益堅至明日哺時歿者俄蘇大丞相賴通藤公奏加僧官經長之妻丞相之女也助持齋證空命畫明王常日拜供所住之地渴于井水祈求其像冷泉湧出人名其地曰法泉房康平六年十一月十一日寂

江州石塔寺沙門寂禪傳

釋寂禪菅野氏平安城人筑後刺史文信子官至工部員外郎常慕佛法不樂仕途荐乞薙染父不聽焉

長和二年膺蓼莪之憂以年三十遂上睿山拜座主
慶圓剃髮稟戒勤學台啟又從慶祚受三部密處處
雲遊杖錫無定晚居江州蒲生郡石塔寺塔卽阿育
王所造八萬四千之一也禪誅第菴坐觀念佛治曆
三年八月患風痺禪誦不怠至二十日命門弟子曰
明日鷄鳴辨於浴湯便澡沐了跏趺繩牀合掌念佛
如寢而逝異香盈室茶毘所四遠芬郁發越數日始
減年八十三臘五十餘此夕皆夢禪乘紫雲聖衆奏
樂相偕西往矣余如蒲生郡拜瞻靈塔高三丈餘徑
可八尺石厚一尺餘三級九輪巍然出於林表無蘚

封傾側而如新削成者因尋塔緣起寺主曰晉聖德
太子近江之地建四十八寺茲寺最後所成初號成
就寺爾後一條帝以感夢使中使登山蹤跡果見塔
標在地令民鑿開塔基具體而全從此改額號石塔
寺至今塔之四邊雖經春夏不生一草余裴徊歷觀
實如其言也

贊曰契經曰阿育王八萬四千之塔散在東方小洲
隋沙門會函唐武德末來入吾國貞觀九年還曰日
本昧谷東隅佛法晚至未知已前有育王化國人開
發土壤往往得古塔佛像矣以此觀之育王之塔在

此方者久矣嘗聞鎮西關東處處名區猶有育王之塔基是皆與經合符焉禪公臨以發妙香薰豈五分法身自然恆於靈塔歟

和州東大寺沙門覺源傳

濟延

釋覺源華山帝第四子在幼稚時敢肅信佛從醍醐寺明觀僧正祝髮受學後就淡覺仁海二師稟灌頂法長元三年居傳法阿闍黎位寄心密修靈感尤多敕任醍醐寺座主長久年中敘權大僧都永承三年夏司東寺長者尋兼法務康平二年冬住東大寺五年夏轉權僧正治曆元年八月十八日寂壽算六十

六又釋濟延有密學任大僧都治曆二年六月旱敕於東寺修孔雀經法即日大雨任東寺二長者延久年中寂歲五十九

江州三井沙門賴豪傳

釋賴豪伊賀刺史藤有家子蚤擲冠纓入園城寺謁諸碩德習串顯密博學高義尤有感驗白河帝敕所家嗣承保元年冬皇太子生帝悅優詔任其所望豪因乞園城寺戒壇而山徒業已堅執不解是以不能敕裁豪淡怨望不出承曆元年敦文遂薨豪應德元年五月四日無病而寂年八十三世謂豪死成鼠爵

破睿山聖經俗說每每不足信焉

京兆仁和寺沙門性信傳

釋性信三條帝第四子母羽林大將軍藤濟時之女
夢梵僧託宿即有身寬弘二年八月一日生神光照
室雖處幼冲佗如大人七歲有親王宣諱曰師明長
和六年帝昇遐焉棘人戀戀哀毀過禮逮十四歲入
仁和寺師大僧正濟信落飾出家往東大寺登壇具
戒十九於仁和觀音院就信公受傳法灌頂天性靈
敏至悉墨學無不通串又耐勞苦身不解帶口不茹
穀踰月涉歲修練功成法驗如響萬壽二年為灌頂

阿闍黎宗匠赴會軌支井井本師濟信不勝慰喜自
執寶蓋從此密灌師為弟子執蓋隨後者信之例也
治曆元年皇太子病加持立愈二年秋復病信於關
院修孔雀經法不幾再痊太子喜觀弘法自筆十喻
詩及驢騮二匹四年春後冷泉帝不豫於賀陽院行
孔雀明王供至第七日聖躬平復延久四年太子瘡
瘡愈面皯癩令信修藥師法太子夢一高僧來自仁
和香水灑面覺癩如拭後朱雀帝藤皇后兩手有瘡
大醫博士雅忠奏以難治信誦大日藥師火界等咒
精祈至曉頓愈左僕射藤教通久病不瘳到仁和寺

受信加持經三日後病除歸家治曆三年春藤公患
癱醫家失術信修孔雀經法修中癱治博士雅忠吐
舌驚歎曰凡癱及徑五寸則必死矣咒力不可思議
也藤公大喜割尾州堤田莊阿州篠原田寄仁和寺
藤參議師成數月病惱謁入仁和經宿病瘳藤亞相
師忠之妻病熱如火信乃授戒咒灑香水熱散尋愈
大相國道長藤公之女彰子稱上東門院初二歲死信在
高野藤公大哀累屍錦囊就山乞救信持五鈷加持
卽蘇信此夏在山修尊勝法及期滿還和州牧藤伊
綱迎信拜曰私第在路願奉一宿中夜藤牧懷死女

泣曰貴垂法救侍僧皆曰藤氏狂矣信素慈仁愍諾
加持稚女忽蘇經範法師耳根生腫醫方無効來乞
法驗信持念須臾膿出腫平沙門延禪童夜狂病與
信生飯童子託言我老狐也爲神所縛痛不可言自
今不作惱害狂疾頓除凡得信袈裟片段念珠一顆
鉢飯少許者病患皆消承曆元年二月洛東法勝寺
成選名德爲供養導師信中選救主寺務二年戊午
修大乘會於法勝寺帝迴翠華永保三年於六條宮
修孔雀經法教敘二品皇子出家昇于品階信爲始
也修孔雀經法前後二十餘度每修有應應德二年

九月二十七日向西唱佛端坐而化昔紫雲見焉音
樂聞焉春秋八十有一火浴衣帶不壞信三時勤修
一生不弛世謂弘法之再身也
贊曰信公派出天潢入毘盧海誠精純白三密相應
左之右之從其所禱比本宗之始祖不減其德是又
異方之高僧所絕而無也

京兆仁和寺沙門長信傳

釋長信大相國道長滕公子初從延尋僧正剃戒後
拜性信親王傳灌頂密印永承五年冬任權少僧都
尋敘一身阿闍黎天喜二年秋司東寺長者治曆元

年秋領寺務并法務明年轉權僧正秋七月畿甸旱
敕信祈雪率二十僧於神泉苑修孔雀經法至期不
雨奏延三日於是文武百官持華齋香陪於泉苑應
時大雨霽衣而歸延久三年夏詔住圓宗寺帝率百
僚行幸賜封二十五戶翌歲九月晦日遘病而寂年
五十九

京兆仁和寺沙門信覺傳

釋信覺大丞相公季藤公之子卅歲出家從大僧正
深覺承灌頂法密學修感朝野銘仰延久元年敘法
印三年辛亥住東大寺承保元年移仁和寺任權大

僧都明年春爲東寺長者尋司法務永保二年身夏
至秋旱魃爲瘧畿內殿屎範俊先祈無應更救覺祈
約二七日修孔雀經法當第十日膏雨連日救藏人
辨伊家東寺壇所賞聽輦車三年正月任權僧正承
曆元年春轉正後辭僧綱靖居福岡應德元年九月
十五日正心而化年七十四皆稱福岡僧正

洛北大雲寺沙門文慶傳

釋文慶參議藤佐理子從園城寺餘慶悉得顯密奧
祕又就勸修勝算二兄益研所業感應日著名聞輦
下救住洛北大雲寺時智證門侶多集巖藏藤后彰

子醫藥無驗救慶加持修不動供明王託曰皇母之
命雖定業極依子丹烟當延三月果過九旬而后崩
詔任法印慶修千日護摩至結願且不動尊形現爐
壇上吏部尚書敦忠親王三條帝之子就慶出家法
諱悟覺巖藏西谷構理智院觀坐誦經因割寄江州
島之郡莊慶夢跋難陀龍供開伽水左袂拂地慈泉
沸騰因告曰此水在茲人未知之是三井金堂水源
也晨視其處果清泉出冬溫夏冷不分澇旱號跋難
陀龍池園城慶祚來臨池曰金堂水源則請試其實
投念珠歸已經三日其珠數浮在金堂水三日遲滯

以被礙總也從此三井門流念珠無總云

京兆釋王寺沙門賴尋傳

釋賴尋山城州人未詳何姓或曰攝津守源滿仲之子也隨仁和寺性信親王稟傳法灌頂性嫌僧綱終于阿闍黎位開釋王寺爲第一世博綜密乘事相無缺持不動尊常修護摩至八千枚見明王兩脚云

城州愛宕山沙門眞統傳

釋眞統住愛宕山月輪寺常持法華嘗誦經日常在靈鷲山及餘諸住所日本豈不在餘所乎願我親見眞佛仍作猛誓愈勵誦經每字三禮闍伽一前漸歷

年所遂終八軸其夜夢神人告曰當誦石清水翼朝詣祠見統在帳前主殿呵出俄社務告曰夜來感夢殿裡高賓不可輕蔑請統恭敬焉統因知牟尼之應迹也

遠州潮海寺沙門大聖傳

釋大聖遠州城東郡潮海寺住僧也德行邁人驗法蒙物嘗囚收馬聖所尊像賊自被縛聖命免之平生修彌陀法示寂之時蓮華三莖植于壇下遠近緇素競來瞻禮寬治年中也

城州醍醐寺沙門義範傳

釋義範姓藤氏肥後州人隨事仁海習申密教後從
成尊受兩部灌頂又拜性信益究資深其性彊直持
念如意初海瘋胸授弘法之五銛修大佛頂咒痛心
卽筮開遍知院傳示密法範在道場高談交誼弟子
承任窺之無人只有大師画像其像於今在院焉永
保二年夏秋之交畿甸大旱帝敕範俊於神泉苑修
請雨經法範師傳法臘共長於俊因懷憤怨入醍醐
山修寶樓閣法礙俊之修旣而苑上黑雲驟隸王城
之人覩望必雨醍醐山頂暴風俄來吹散苑雲如是
數四都下童謠曰範俊雲又馳義範風復吹過二七

日俊破壇太應德三年冬敕爲東寺長者任權少僧
都實治二年秋旱奉敕修請雨經法於神泉苑至第
三月大雨降灑詔藤參議爲隆賜璽書曰法雨靈驗
下民歡娛天感有餘賞可依請二年春依病辭諸職
閏十月五日取滅於所任年六十六矣

江州睿山沙門禪意傳

釋禪意在台嶺稟密灌於尋禪僧正持修精勤得法
驗成貧者乍富疾病卽痊詣紀之粉河寺祈觀音大
士曰願得高位不然示我來果夢天童告曰三密堅
修必得聖果意還山菴居長時觀誦臨込手結密印

口唱阿字湛然而寂不記壽寬治三年春也
贊曰欲高位思來果者欲癡之舉也然修驗成者何
也通曰事相者不擇慧愚行者意念純壹則必獲悉
地矣若夫三密成熟達阿字之性者聖果何疑哉天
童之言於意公豈徒然哉

攝州兔原山沙門慶日傳

釋慶日京兆人久在睿山長于義論晚住攝州兔原
誦法華修密法艸菴之外無別宇經論之外無餘資
每雨夜出行必有持炬擊笠者行人近而見之炬笠
共無又指紳車馬之客必盈菴駢闐村民何見人馬鳥
有臨終無病誦經結印而逝忽有百千人悲號慟哭
里民驚往但聞其聲不見其形時人皆謂諸天神聖
之冥感也

越後國上山沙門佛蓮傳

釋佛蓮止江州安祥寺修法純真後居越後古志郡
國上山三時湯沐持誦法華從者倦皆逃太忽二童
來曰我等二人能任給使自稱一名黑齒一名華齒
強力勇健負薪汲水設浴營齋使令隨意不知世務
遠離諸緣一心誦經某年月吉祥入定過七七日一
童亦太

贊曰黑齒華齒者十羅刹女中之二天子也法華會上同聲白佛言欲擁護讀誦法華經者除其衰患以此可知經文無虛復蓮之有德矣

江州延曆寺沙門良真傳

釋良真號圓融源通輔子其先光孝帝之孫學於座主慶命後嗣僧正明快顯密兼通修驗揭焉名卿貴士趨塵崇奉永保元年秋救補延曆寺座主二年冬法勝寺堂塔落慶詔爲供養導師承曆元年白河帝又救真禱儲明年冬太子誕卽堀河帝也舉任僧正寬治五年加大僧正藤后媿子郁芳門院疾賴豪之靈祟

也救真歷之率二十僧轉大般若於日吉社修威德法於慈悲廟社殿震動廟放電光期滿無効宣令歸山奏延二日堅誓持念咒縛崇靈后惱卽安上皇睿感賜以糸絲二十匹衆各十匹又前唐院置阿闍梨六人日吉社寄封五十戶聽牛車賜良馬六年冬大衆騷擾退居西京七年八月山徒數千相率燒破真之住房弟子房舍散處山中者永長元年三月上皇幸房問安真獻龍智菩薩之五鈷杵以二年五月十三日取滅住房春秋七十二時人稱西京座主贊曰永保寬治之時山徒拂亂數焚破二井及真房

舍弟子之院以真之純感而據重職坐視無奈之何
吁至劫火洞然大未亦不能免者與

城州醍醐寺沙門定賢傳

釋定賢大納言源隆國之子從醍醐座主覺源僧正
受灌頂法學術純真馳名密教康平五年補醍醐寺
座主永保三年任權少僧都司東寺長者應德元年
領寺務二年冬十月東寺寶塔落慶為供養導師三
年冬兼法務寬治二年夏五月久旱敕就東寺修孔
雀經法修中兩度降大法雨賞任權大僧都初秋又
旱醍醐住房修孔雀經法至第三日電雷響天甘澤

流地永長元年敘法印康和二年十月六日化年七
十有七

京兆東寺沙門經範傳

釋經範參州刺史源經信子投仁和寺從親主性信
稟兩部灌頂瑜伽祕軌修證入神嘉保二年權東大
寺寬治三年任權少僧都六年春為東寺長者康和
二年移山階寺轉大僧都明年敘法印是歲七月亢
旱敕範法雲伴二十僧修孔雀經法於東寺僅至二
日雷雨大澍四日相連賞補法務長治元年三月十
七日寂住世七十四初承曆四年春二月仁壽殿火

觀音供絕十六年永治元年春範奏繼絕帝宜給事中成宗曰方今仁壽未成何修之有範復奏曰我祖弘法置此供時仁壽爲常殿故修於茲近御清涼清涼爲宜以近宸應修也緣是而言縱仁壽成未如清涼之密邇帝以範言爲然令移於清涼範舉定賢代而修之於今不絕俗曰二間供贊曰觀音供者宮典之大者也建迺祖之絕修而讓舉於人斯二物者人之所難而以爲易焉復議之言正而不阿補袞之闕者範亦在焉已

河州錦織沙門行觀傳

良意

釋行觀皇太子敦明之子三條帝之皇孫也慕勤息行依三井之定基僧都削髮進具顯密二教悉登靈府任大僧正而隨其性之所好棲遲乎河州錦織鎮守府將軍源義家有鍾愛女無病俄死聞觀證驗屈請懇乞觀作法加持女忽甦生源公起拜曰子孫永歸師之門葉觀不權官寺終於所住時人稱錦織僧正又釋良意與州刺史藤良經子承觀公法常居三井人稱其所住號唐房精于台教尤究瑜伽

京兆仁和寺沙門覺行傳

釋覺行白河帝第三子母藤氏九歲入性信室習誦

密放十一祝髮後補仁和寺務寬治六年春任一身
阿闍梨於觀音院就大僧都寬意入灌頂壇承德二
年春修結緣灌頂檢校園宗法勝兩寺康和元年春
敘親主俗曰法親主二年夏鳥羽上皇不豫行率僧
綱四員阿闍梨十一員於紫宸殿修孔雀經法七日
平愈四年七月尊勝寺成行爲供養導師帝幸法會
詔補長吏秋昇一品長治元年尊勝寺裡構灌頂院
修結緣會是日法駕臨幸賜賞十一月十八日寂壽
算三十一

江州園城寺沙門隆明傳

釋隆明太相國道隆藤公之孫黃門侍郎隆家之子
從園城寺心譽明尊學顯密法自十一歲永不解帶
修練精進効感如神寬治元年爲護持僧二年春白
河上皇幸高野山供養山衆請延曆寺慶朝爲導主
而大師遺制不雜他門朝以慈覺徒山衆議曰智證
之裔不違祖制乎依此更命明爲導師明啓白曰管
世尊辭王位而入雪山今太上皇出射山而攀靈窟
往管未聞向來當難雙眼漣爾上皇拭淚三年秋上
皇幸睿山俄腰疾發山衆加持御惱不息召明持念
卽時平復五年三月藤后媿子有妖病召明加持后

日任僧正以謝法驗焉五月又發明又加持時賴豪
之崇靈幻出明日我在園城夢邂逅于唐院公曰先
師心譽遷化之後園城佛法久致寂寥子盍吹法螺
補其闕典此語還記否公自今後不可近宮后病有
間至是漫無初命稱病不出后日從病惱坐僅經三
十日愁非可貴明憤激曰惜片時之命有情之常也
況延一月乎爾後崇發頻召不起使參議時範宜綸
言於是入宮作法加持妖即時除署權僧正六年七
月白河上皇幸金峰山請百員僧供養法華經百部
金泥五部大乘經明爲導師還御惱發明持念即平

永長元年羊藤后遂崩既經日時召明祈蘇明日我七
歲辭父母自十一歲持尊星王其誓曰削灰札而作
生札今非始述本誓不謬高採念珠誠心加持后得
暫蘇食頃長逝闔宮奇歎未曾有也嘉保二年聽輦
車爲最勝講義者康和四年授大僧正承德二年任
三井長吏長治元年九月十五在取滅行年八十五
或曰四年寂然則八十八也

京兆東寺沙門覺意傳

釋覺意源參議基平子得長信僧正之手度沐性信
親王之灌頂二師密軌具達玄奧住仁和大教院承

保二年敎法眼移圓敎寺任權少僧都應德三年轉
正嘉保二年加東寺長者明年轉權大僧都嘉承元
年六月亢旱敎意祈雨七月五日於東寺灌頂院率
伴僧二十員修孔雀經法至十三日雷雨十六日又
大雨弟子嚴覺賞敎法眼二年三月弘法之忌日取
滅於大敎歲五十六

京兆東寺沙門範俊傳

釋範俊興福寺太威儀師仁靜子也初從傳法院松
朝粗問識智後依小野成尊僧都稟兩部大法專營
密敎義範齊名延久六年成尊寢病白河帝遣中使

問疾且宣曰俊與範孰愈尊奏曰二子無優劣豈二
弟侍尊舉首見俊中使以事復命帝知尊之意實在
俊也永保二年承敎禱雨爲範所礙隱那智山屬皇
畿有災祥帝甚憂之夢異人奏曰應請竹人禳之寤
詢羣臣無能論者江都督匡房曰以臣料之範俊是
也從竹從人帝卽感悟詔俊歸都卽日入內修愛染
法災孽消除宮中安寧敎主小野曼茶羅寺帝讓位
後遷鳥羽宮爲護持僧常陪離宮修愛染王及尊勝
法任權大僧都俊以弘法大師飛行三鈷密軌及小
野相承祕書奏納鳥羽寶藏弟子嚴覺監司藏室康

和二年補興福寺務長治三年爲東寺長者兼領寺務天仁三年任權僧正天永三年四月二十四日化報齡七十五世呼曰鳥羽僧正

洛北大雲寺沙門恆久傳

圓慶

釋恆久或曰出朝貴家隨慶祚于園城承顯密訣結宇昂藏號蓮華坊功積修成救急除疫飛鉢空中如倦飛翼或誦祕咒躍鉢壇上朝廷嘉其驗德任傳法阿闍黎位不詳其終又同寺有圓慶太內記慶保胤之子也保胤出家後日寂心慶承法文慶住大雲寺嘗令大佛工定朝雕刻五大尊像安如法院密感顯

應母修護摩不動明王現於壇上云

本朝高僧傳卷第五十

音訓

噉 同啖 藜 盧谷切 佗 魚乞切 樂 盧官切 屎 虛移切 閑

伽 上安萬切 香水器 葳 彌列切 媿 杜兮切 嬰 同嬰

江府住玉泉軒成九居士信施淨財錄

本朝高僧傳卷五十 茲冀

上報四恩下資三有家道繁興種智圓明

寶永丁亥佛成道之日

濃州路加納盛德禪寺 知藏比丘 識

終

